

19 JUN 1998

Umno-Reaksi (BN)

RAKYAT DIMINTA TERUS BERI SOKONGAN UNTUK PULIHKAN EKONOMI

KUALA LUMPUR, 19 Jun (Bernama) -- Para pemimpin parti komponen Barisan Nasional (BN) hari ini mengajak rakyat supaya mengambil iktibar daripada amanat Presiden UMNO dan Perdana Menteri Datuk Seri Dr Mahathir Mohamad serta menyokong beliau dalam usaha memulihkan ekonomi negara.

Menurut mereka, sekiranya rakyat enggan membantu, segala usaha yang dilaksanakan kerajaan selama ini akan menjadi sia-sia dan kini bukan masanya untuk menuding jari menyalahkan mana-mana pihak.

Presiden MCA, Datuk Seri Dr Ling Liong Sik berkata Dr Mahathir telah bersusah payah menerangkan tindakan yang telah dilakukan spekulator-spekulator kewangan yang menjejaskan kestabilan ekonomi negara-negara Asia Timur.

Kata Ling, yang juga Menteri Pengangkutan, sekiranya kegiatan manipulasi oleh kumpulan itu dibiarkan berterusan, segala usaha yang dijalankan dalam Dasar Ekonomi Baru (DEB) akan gagal.

"Demi kepentingan negara, rakyat Malaysia mestilah bekerjasama untuk mengatasi masalah ini secara bersama," katanya ketika diminta mengulas ucapan dasar Dr Mahathir semasa merasmikan Perhimpunan Agung UMNO di Pusat Dagangan Dunia Putra, di sini.

Presiden MIC, Datuk Seri S. Samy Vellu berkata rakyat perlu mempercayai dan menyokong segala rancangan dan langkah-langkah yang diambil Perdana Menteri bagi memulihkan ekonomi negara.

Menurutnya, rakyat harus menjaga negara ini dan tidak menjadi agen kepada anasir-anasir yang suka merosakkan negara.

"PM telah menggariskan beberapa panduan untuk mentadbir negara dan bukannya mentadbir mengikut telunjuk orang," kata Menteri Kerja Raya itu lagi.

Ketua Menteri Sabah, Tan Sri Bernard Dompok pula berkata rakyat tidak harus mempertikaikan usaha yang dilakukan kerajaan dalam memastikan semua kaum mendapat pembelaan sewajarnya dari segi ekonomi.

Dompok yang juga Presiden Parti Demokratik Sabah berkata rakyat perlu memberi perhatian serius terhadap seruan Dr Mahathir agar rakyat terus bersatu dan memberi sepenuh kepercayaan kepada kerajaan dalam menangani kegawatan ekonomi.

Presiden Gerakan, Datuk Seri Dr Lim Keng Yaik berkata sekarang bukan masa untuk menuding jari dan menggunakan perkataan yang mempunyai maksud yang negatif seperti kronisme dan nepotisme.

-- BERNAMA

TM oba